

Powšitkowne WOZJEWJENJA

njedźelu, 16. januara 2022

Wusyłanje Božemu mšow

Serbskorěčnej Božej mši móža wěriwi tutu njedźelu, 16. januara, znova jako livestream w interneće scěhować. Jedne kemše přenjesu so we 8.30 hodź. z Kulowskeje a dalše w 9 hodź. z Chróšćanskeje cyrkwy. Linkaj na njej stej w interneće pod www.posol.de a na wosadnymaj stronomaj podatej.

Swjedzeń swjateho Bosćana

Předsydstwo Bratstwa swjateho Bosćana přeprošuje wšitkich na swjedzeń swjateho Bosćana štwórtk, 20. januara, do Chróscic. Bože mše budu w 7.00 hodź., 9.00 hodź. a 19.00 hodź. Hóštny předar na rańšich a dopołdnišich kemšach budže Steylski misio- nar pater Slawomir Rakus z Drježdžan. Swjedženski nyšpor z wobchadom po wsy bu- dže w 14.00 hodź. Hłowna zhromadźizna člonow bratstwa wotměje so pozdžišo. Wěriwi ze wšitkich serbskich wosadow su přeprošeni, do Bratstwa swjateho Bosćana zastupić. Štóž chcył so z člonom bratstwa stać, njech so hač do wutory, 18. januara, na Chróšćanskej farje přizjewi, telefonowe čisło (03 57 96) 8 04 00.

Chorych a mrějacych přewodźeć nawuknyć

Ambulantna hospicna služba Hornjołužiskeho zwjazka Carity z.t. w Kamjencu poskićuje lětsa zaso kurs k čestnohamtskemu přewodženju chorych a mrějacych. K tomu trěbna wěda so w zakładnym kursu posrědkuje, kotryž wotměje so wot 16. měrca hač do 13. ap- ryla pjeć króc srjedu wot 17 do 21 hodź. a dwójce sobotu wot 9 do 15 hodź. Na to scěhuje dohromady 40hodžinski praktikum z dalšimi štyrjomi zetkanjemi. Pohłubšacy kurs je w septembru planowany. Štóž chcył wukubłanje absolwować, móže so pola hospicnej služby Carity w Kamjencu pod telefonowym čislom (0 35 78) 37 43 12 za kurs přizjewić.

Serbske wukubłanje JULEICA

Worklečanske młodžinske dušepastyrstwo přewjedže za zajimcow kurs JULEICA. Wobdźělnicy dóstanu kartu, z kotrejž so wobkrući, zo su wotpowědny kurs wopytali a sej kmanosće čestnohamtskeho nawjedowanja młodžinskih skupin přiswojili. Prěni džěl wotměje so wot pjatka do njedźele, 11. do 13. měrca, we Worklecach, druhi toho- runja wot pjatka do njedźele, 1. do 3. apryla, w Smochćicach, tam z přenocowanjom. Zajimcy měli so hač do srjedy, 19. januara, online přizjewić. Link je pod www.posol.de podaty.

Mandželski seminar

Seminary k přihotej na sakrament mandželstwa wotměja so stajnje pjatk a sobotu, 11. a 12. februara, 11. a 12. měrca kaž tež 25. a 26. nowembra w Smochčanskim ku- blanišću swjateho Bena. Přizjewjenja za seminar w februaru přijimuju so hač do srjedy, 26. januara, ale jeničce online. Link je pod www.posol.de wozjewjeny.